

Neujahrsansprache WISG – Wirtschaft Region St.Gallen – 7.1.2021

Gschätzti WISG-Mitglieder

Alles isch andersch.

Zwoor ä neus Joor.

Aber äbän andersch.

Statt persönlich i dä acrevis, bimenä Glas Wii mit Baggäküssli, Handgeschüttel und Schulterklopf trifft mä sich also etz online, defür gad mittlere ganze Fläschä Wii.

Alles isch andersch.

Lockdown light, Maske-Dischtanz und Home-Office und sitt au no d Beizä zue händ, mömmer d Sitzigä im Büro abhaaltä. Oder äbä online.

Alles andersch und sogar da änderet ständig, ä Soufflé isch jo no stabiler.

Und da isch usäfordernd.

Es sind Zittä, won ä Güetaerabwägig Menscheläbä beinhaltet. Und wenn dä Mensch zum Guet wört, wörts Läbä doch abwägig. Wa passiert nu mit därä Wirtschaft, wenn dä Wirt nöd schafft, und d'Rechnig ohni ihn gmacht wört?

Umsatz- und Mietiibuessä, Schuldä, Stüürerhölig, und die ständig Angscht, dass WC-Papier uusgoobt, wenn dä Lockdown iitritt.

Aber au wämmer momentan gad nöd wüssed wüvill Impfigä mier bi all dene Mutationä wohl no verpasst überchömed, werded mier wenigstens nümmer vo dä Frau is Theater mitgschleppt.

Oder dä Herallerliebscht haut nümmer is Stadion ab. Und d Wienacht isch jo eigentlich au ganz entspannt gsii, so im kliinä Kreis, und endlich hätt's emol gnuég Filet im Teig für ein selber ghaa.

So andersch die Situation au isch, äs gitt jo also – zumindest kliini – Positivitätä.

Da hilft üüs doch hoffä, dass wa andersch worän isch, sich au wider änderet.

Und d Uusichtä sind nöd schlächt. Mit äm Neuä Joor schiint ä Liecht am Endi vom Tunnel. Hoffed mier, dasses kein Zug isch.

Will Corona mag villicht goo, aber di neu Stadtpräsidentin vo Sanggallä bliibt.

Im Zentrum vo dä Wirtschaftsregion St.Gallä wechslet s Stadtpräsidium vomänä Banker zunnere Sozialpädagogin. Mit än Grund wiso d WISG Inä ä ganzi Sibädezi zum Neujoor überreicht.

Und so bliibt Viles wohl etz au andersch.

Statt mit «Fit 13 Plus» und «Fokus 25» müemer etz wohl mit Multikulti-Gschpürsch-mi-fülsch-Workshops rechnä - partizipativä.

Mit em ehemolige Städtpräsident Thomas Scheitlin und sim verdankenswerte, unermüedliche liberalä Lisatz für Stadt und Region verlüred d WISG än Mitstreiter im Geiste, jo, wenss politisch nöd anrühig wär, möchte mä fascht „Genosse“ sägä. Mier gönned ihm sin Ruhestand, au wenss än Verluscht isch.

Än kliinä Veluscht isch au dä Matthias Gabathueler – beziehigswiis sini Nichtwahl zum

Stadtpräsident. Vo dä Wirtschaft Region St.Gallä unterstützt, hätt's immerhin für dä Stadtroot glanget

und mir sind üüs sicher, dass i vier Joor d Kaarte neu gmischt werded. Dänn dank sinnere strategische Position als Direktor Bildig und Freizitt hätt är Zuegriff uf än wiituus grösseri Aazaahl Ehemolige-Adresse als i sinnere Kanti. I dem Sinn wünsched mir än guetä Start im neuän Amt. Aber natürlich simmer hoffnigslos zueversichtlich, dass mir au mit dä Maria Pappa konschtruktiv und zielorientiert chönd zämäscaffä, sprich under Druck setze.

Mier wünsched a derä Stell natürli au dä Maria Pappa än guetä Start i dä neue Position. Als Begrüssigspräsident hämmier irä ä Bilanz zum Uusmoolä überreicht. Malen nach Zahlen. Ä Zeichä dass mir mit irä rechnäd, und da beinhaltet im Fall au Subtraktion.

Denn die Kriisä trifft hert, es wört eim ganz andersch.

Aber hebet Si durä. 2021 verspricht mindeschtens en Uufbruch Richtig Normalzuestand, au wenn eim i dä i dene Tääg klar worän isch, dass au 2021 zwölf Mönet hätt.

Un drum isch es guet, dass nöd alles andersch isch und öppis gliich bliibt:

D WISG setzt sich au 2021 för än erfolgriichi Entwicklig vom Wirtschaftszentrum SanGallän ii. Drum wört unerbittlich gegä jedi Ufhebig vo Parkplätz protschtiert. Parkplätz sind wichtig vör da Standort. Vor allem för dä vom Auto.

Dä lisatz glingt aber nur dank dä Unterstützig vo dä Mitglieder, Sponsorä, und Partnerverbänd, sowie dank em engagierte Vorstand, won ä kompetent Gschäftsleitig eifach schaffä loot.

So lönd üs uf das Neue Johr aastossä,

Uf dass äs sich andersch änderet und zwor guet.

Inä allne nurs Bescht zum Neue Joor.

Und vor allem: Bliibed Si gsund.

Richi Küttel, 2021